

Escrito por Redaccion @valminorinfo
Martes, 15 Abril 2014 21:18



Xa está en marcha a sétima edición do **Dar de ler coma quen dá de beber**, unha sesión de lecturas en voz alta para conmemorar o Día do Libro en Gondomar organizada pola [Asociación Espazo Lectura](#)

. Este ano o acto terá lugar o venres 25 de abril entre as 20:00 e as 22:30 horas na Tapería Rural Ardora (San Sebastián, 4, Mañufe).

Como en ocasións anteriores preténdese reunir arredor de 30 persoas nun espazo público para ler e escoitar, para compartir e recomendar as lecturas que nos gustan e celebrar así o Día do Libro lendo. A idade mínima para participar é de 14 anos.

Como se pode participar?

Débese escoller un fragmento dun libro, preferiblemente en lingua galega, cuxa lectura non exceda os 3 minutos (é importante cingirse ao tempo). E finalmente comunicar antes do luns 21 de abril o nome do participante, o libro e o autor escollido ao correo electrónico espazolectura@gmail.com ou chamar ao teléfono 637923703

Para organizar máis facilmente o acto, débese engadir se prefire ler entre as 20:00h e as 21:15h ou entre as 21:15 e as 22:30h. A organización tentará, na medida do posible, aterse a esa elección e evitar en todo caso que haxa cambios durante a celebración do acto con

Escrito por Redaccion @valminorinfo
Martes, 15 Abril 2014 21:18

respecto á orde fixada.

Sete anos percorrendo espazos públicos e festexando a Semana do Libro en Gondomar.

Dar de ler coma quen dá de beber é unha actividade que toma o seu nome dunha frase do escritor Álvaro Cunqueiro e que se leva a cabo no venres máis próximo ao Día Internacional do Libro. Consiste nunha lectura de textos, colectiva e en voz alta, que se realiza nalgún espazo público e na que participan arredor de 30 persoas, que len os textos elixidos por elas mesmas, co ánimo de sensibilizar a cidadanía sobre a importancia da lectura. Trátase dunha actividade itinerante, que busca levar a lectura a lugares nos cales habitualmente non está presente, apostando por abrir espazos e tempos para a lectura e por facer desta un lugar de encontro.

Os lugares elixidos en sesións anteriores para estas lecturas foron variados: Biblioteca Municipal de Gondomar (2008), Mercado de peixe e verduras de Gondomar (2009), xamonería Catro Camiños (2010 e 2011), cafetería Keik (2012). Cada ano un lema distinto vencellado co espazo escollido acompaña esta actividade.

A semana do Libro en Gondomar.

O acto adoita celebrarse ás 20:00 horas e enmárcase dentro da [Semana do Libro, durante a que Espazo Lectura programa unha actividade diaria](#) en Gondomar.

Os nomes dos participantes quedan recollidos nunha publicación.

Con motivo desta actividade, Espazo Lectura edita anualmente un número *de **Lecturas da Grampa*** que contén os títulos e autores dos libros recomendados, así como o nome de cada persoa lectora, exemplar que se reparte de xeito gratuíto durante o acto, de forma que o intercambio de lecturas sexa o máis efectivo posible.